

四庫全書

經部

欽定四庫全書

經部

周官新義卷一至三

詳校官監察御史臣祝德麟

刑部郎中臣許兆椿覆勘

謄錄監生臣黃維

謄錄貢生臣范重榮

欽定四庫全書

經部四

周官新義

禮類一 周禮之屬

提要

臣等謹案周官新義十六卷附考工記解二卷宋王安石撰安石事迹具宋史本傳晁公武讀書志曰熙寧中置經義局撰三經義皆本王安石經說三經書詩周禮也新經毛詩義凡二十卷尚書義凡十三卷今並佚周官

新義本二十二卷明萬厯中重編內閣書目
尚載其名故朱彛尊經義考不敢著其已佚
但注曰未見然外間實無傳本即明以來內
閣舊籍亦實無此書惟永樂大典者所載最
夥蓋內閣書目據文淵閣書目文淵閣書目
即修永樂大典所徵之書其時得其完帙故
採之最詳也考蔡條鐵圍山叢談曰王元澤
奉詔為三經義時王丞相介甫為之提舉詩

書益多出元澤及諸門弟子手周官新義實
丞相親為之筆削者政和中有司上言天府
所籍吳氏資多有王丞相文書於是朝廷命
藏諸秘閣用是吾得見之周官新義筆跡猶
斜風細雨誠介甫親書云云然則三經義中
惟周禮為安石手著矣安石以周禮亂宋學
者類能言之然周禮之不可行于後世微特
人人知之安石亦未嘗不知也安石之意本

以宋當積弱之後而欲濟之以富強又懼富
強之說必為儒者所排擊于是附會經義以
鉗儒者之口實非真信周禮為可行迨其後
用之不得其人行之不得其道百弊叢生而
宋以大壞其弊亦非真緣周禮以致誤羅大
經鶴林玉露詠安石放魚詩曰錯認蒼姬六
典書中原從此變蕭疎是猶為安石所紿未
究其假借六藝之本懷也因是而攻周禮因

是而攻安石所註之周禮是寬其影附之巧
謀而科以迂腐之薄譴矣故安石怙權植黨
之罪萬萬無所辭安石解經之說則與所立
新法各為一事程子取其易解朱子王應麟
均取其尚書義所謂言各有當也今觀此書
惟訓詁多用字說病其牽合其餘依經詮義
如所解八則之治都鄙八統之馭萬民九兩
之繫邦國者皆具有發明無所謂舞文害道

之處故王昭禹林之奇王與之陳友仁等注
周禮頗據其說

欽定周官義疏亦不廢採用又安可盡以人廢耶安石
神宗時所上五事劄子及神宗日錄載安石
所引周官及楊時龜山集中所駁平頌興積
一條其文皆在地官中今永樂大典闕地官
夏官二卷其說遂不可考然所佚適屬其瑕
類則所存者益不必苛詆矣安石本未解考

工記而永樂大典乃備載其說據晁公武讀書志蓋鄭宗顏輯安石字說為之以補其闕今亦並錄其解備一家之書焉乾隆四十六年九月恭校上

總纂官

臣紀昀
臣陸錫熊
臣孫士毅

總校官 臣 陸費墀

--	--	--	--	--	--	--	--

原序

士弊於俗學久矣聖上閔焉以經術造之乃集儒臣訓
釋厥旨將播之校學而臣某實董周官惟道之在政事
其貴賤有位其後先有序其多寡有數其遲數有時制
而用之存乎法推而行之存乎人其人足以任官其官
足以行法莫盛於成周之時其法可施於後世其文有
見於載籍莫具於周官之書蓋其因習以崇之庚續以
終之至於後世無以復加則豈特文武周公之力哉猶

四時之運晝夜積而成寒暑非一日也自周之衰以至於今歷歲千數百矣太平之遺迹掃蕩幾盡學者所見無復全經於是時也乃欲訓而發之臣誠不自揆然知其難也以訓而發之之為難也則又以知夫立政造事追而復之之為難然竊觀聖上致法就功取成於心訓迪在位有馮有翼疊疊乎鄉六服承德之世矣以所觀乎今考所學於古所謂見而知之者臣誠不自揆妄以為庶幾焉故遂昧冒自竭而忘其材之弗及也謹列其

書為二十有三卷凡十餘萬言上之御府副在有司以待制詔頒焉謹序

金史巴屋合言

原序

欽定四庫全書

周官新義卷一

宋 王安石 撰

天官一

惟王建国辨方正位體國經野設官分職以為民極
畫參諸日景夜考諸極星以正朝夕於是求地中焉
以建王國此之謂辨方既辨方矣立宗廟於左立社
稷於右立朝於前立市於後此之謂正位宮門城闕
堂室之類高下廣狹之制凡在國者莫不有體此之

謂體國井牧溝洫田萊之類遠近多寡之數凡在野者莫不有經此之謂經野設官則官府之六屬是分職則官府之六職是也設官分職內以治國外以治野建置在上如屋之極使民於是取中而芘焉故曰以為民極極之字從木從亟木之亟者屋極是也乃立天官冢宰使帥其屬而掌邦治以佐王均邦國發露人罪而治之者刑官之治也小覆人罪而治之者治官之治也治官尚未及教而況於刑乎宰治官

之上也故宰之字從𡵓從臯省𡵓覆人罪之意宰以
治割調和為事故共刀匕者謂之宰宰於地特高故
冢謂之宰也山頂曰冢冢大之上也列職於王則冢
宰與六卿同謂之大百官總焉則大宰於六卿獨謂
之冢以左助之為佐以右助之為佑地道尊右而左
手足不如右彊則佐之為助不如右之力也冢宰於
六卿莫尊焉而曰佐王則為其非論道以助王也作
而行之而已邦亦謂之國國亦謂之邦凡言邦國者

諸侯之國也凡言邦言國者王國也亦或諸侯之國
國於文從或從口為其或之也故口之故凡言國則
以別郊野邦於文從邑從丰是邑之丰者故凡言邦
則以別於邑都亦或包邑都而言焉凡國有大事戮
其犯命者則以別於郊故也國中自七尺以上則以
別於野故也若國凶荒令調委之則以別於國故也
邦中之賦則以別於甸削縣都故也令邦移民就穀
則以包邑都而言故也

治官之屬大宰卿一人小宰中大夫二人宰夫下大夫
四人上士八人中士十有六人旅下士三十有二人府
六人史十有二人胥十有二人徒百有二十人

大宰卿小宰中大夫則卿上大夫也王制曰諸侯之
上大夫卿蓋非特諸侯之卿為然也卿之字從𠂔𠂔
奏也從尸尸止也左從𠂔右從尸知進止之意從𠂔
黍稷之氣也黍稷地產有養人之道其𠂔能上達卿
雖有養人之道而上達然地類也故其字如此夫之

字與天皆從一從大。夫者妻之天故也。天大而無上故一在大上。夫雖一而大。然不如天之無上。故一不得在大上。夫以智帥人者也。大夫以智帥人之大者也。士之字與工與才皆從二從一。才無所不達。故達其上下。工具人器而已。故上下皆弗達。士非成才則宜亦皆弗達。然志於道者。故達其上也。士事人者也。故士又訓事事人。則未能以智帥人。非人之所事也。故未娶謂之士。下士謂之旅。則衆故也。旅之字從人。

從从衆矣則從旌旗指揮故也從旌旗指揮則從人而不自用下士之為旅則亦從人而不自用者也府之字從广從付則其藏也付則以物付之史之字從中從又設官分職以為民中史則所執在下助之而已胥之字從疋從肉疋則以其為物下體肉則以其亦能養人其養人也相之而已故胥又訓相也卿從自胥從肉皆以養人為義則王所建置凡以養人而已徒之字從彡從土徒無車從也其彡而走則親土

而已故無車而行謂之徒行也鄭氏以為府史胥徒皆其官長所自辟除蓋自下士以上皆王命也而穆王命大僕曰慎簡乃僚則雖以王命命之而為之長者得簡之也府史胥徒雖非士而先王之用人無流品之異其賤則役於士大夫而不耻其貴則承於天子而無嫌

宮正上士二人中士四人下士八人府二人史四人胥四人徒四十人

宮伯中士二人下士四人府一人史二人胥二人徒二十人

膳夫上士二人中士四人下士八人府二人史四人胥十有二人徒百有二十人

庖人中士四人下士八人府二人史四人賈八人胥四人徒四十人

有藏則置府有書則置史有徵令之事則置徒有徒則置胥有市賈之事則置賈府史賈胥徒皆賦祿焉

使足以代其耕故市不役賈野不役農而公私各得其所

內饗中士四人下士八人府二人史四人胥十人徒百
人

外饗中士四人下士八人府二人史四人胥十人徒百
人

亨人下士四人府一人史二人胥五人徒五十人

甸師下士二人府一人史二人胥三十人徒三百人

王藉千畝而甸師徒三百人則為其以薪蒸役內外
饗之事非特耕耨王藉故也

獸人中士四人下士八人府二人史四人胥四人徒四
十人

獻人中士二人下士四人府二人史四人胥三十人徒
三百人

鼈人下士四人府二人史二人徒十有六人
腊人下士四人府二人史二人徒二十人

醫師上士二人下士四人府二人史二人徒二十人

食醫中士二人

疾醫中士八人

瘍醫下士八人

獸醫下士四人

食疾瘍獸醫無府史徒者醫師聚毒藥以供醫事則有藏矣故有府掌醫之政令而使之分治疾瘍稽其事制其食則其書具有徵令矣故有史有徒諸醫資

藥於醫師受政令聽所使治而已則無所用府史徒
矣

酒正中士四人下士八人府二人史八人胥八人徒八
十人

酒人奄十人女酒三十人奚三百人

鄭氏以奄為精氣閉藏者蓋民之有是疾先王因擇
而用焉與蘧篠蒙鏐戚施直鑄聾瞶司火瞽矇修聲
同若以是為刑人則國君不近刑人而況於王乎若

以為刑無罪之人而任之則宜先王之所不忍也奚
之字從系從大蓋給使之賤係於大者故也

漿人奄五人女漿十有五人奚百有五十人

凌人下士二人府二人史二人胥八人徒八十人

籩人奄一人女籩十人奚二十人

醯人奄一人女醯二十人奚四十人

醢人奄二人女醢二十人奚四十人

鹽人奄二人女鹽二十人奚四十人

冢人奄一人女冢十人奚二十人

宮人中士四人下士八人府二人史四人胥八人徒八十人

掌舍下士四人府二人史四人徒四十人

幕人下士一人府二人史二人徒四十人

掌次下士四人府四人史二人徒八十人

大府下大夫二人上士四人下士八人府四人史八人
賈十有六人胥八人徒八十人

玉府上士二人中士四人府二人史二人工八人賈八人胥四人徒四十有八人

內府中士二人府一人史二人徒十人

外府中士二人府一人史二人徒十人

司會中大夫二人下大夫四人上士八人中士十有六人府四人史八人胥五人徒五十人

司書上士二人中士四人府二人史四人徒八人

職內上士二人中士四人府四人史四人徒二十人

職歲上士四人中士八人府四人史八人徒二十人
職幣上士二人中士四人府二人史四人賈四人胥二
人徒二十人

司裘中士二人下士四人府二人史四人徒四十人
掌皮下士四人府二人史四人徒四十人

內宰下大夫二人上士四人中士八人府四人史八人
胥八人徒八十人

內小臣奄上士四人史二人徒八人

闈人王宮每門四人圍游亦如之

寺人王之正內五人

內豎倍寺人之數

九嬪

世婦

女御

女祝四人奚八人

女史八人奚十有六人

九嬪世婦女御皆統於冢宰則王所以治內可謂至公而盡正矣鄭氏曰不列夫人於此官者夫人之於后猶三公之於王坐而論婦禮無官職然則九嬪視卿世婦視大夫女御視士視大夫士而不言數者鄭氏以為有婦德則充無則闕然九嬪以教九御則世婦之數不過二十七女御之數不過八十一也嬪字從賓則有賓之義婦之從帚婦則卑於嬪矣而御則尤卑如馬之在御遲速緩急唯御者之聽故也

典婦功中士二人下士四人府二人史四人工四人賈
四人徒二十人

典絲下士二人府二人史二人賈四人徒十有二人
典泉下士二人府二人史二人徒二十人

內司服奄一人女御二人奚八人

縫人奄二人女御八人女工八十人奚三十人

染人下士二人府二人史二人徒二十人

追師下士二人府一人史二人工二人徒四人

屨人下士二人府一人史一人工八人徒四人

夏采下士四人史一人徒四人

大宰之職掌建邦之六典以佐王治邦國一曰治典以經邦國以治官府以紀萬民二曰教典以安邦國以教官府以擾萬民三曰禮典以和邦國以統百官以諧萬民四曰政典以平邦國以正百官以均萬民五曰刑典以詰邦國以刑百官以糾萬民六曰事典以富邦國以任百官以生萬民

典之字從冊從丌從冊則載大事故也從丌則尊而
丌之也則之字從貝從刀從貝者利也從刀者制也
灋之字從水從廌從去從水則水之為物因地而為
曲直因器而為方圓其變無常而常可以為平從廌
則廌之為物去不直者從去則灋將以有所取也然
則典則灋詳略可知矣王之治邦國則班常而已故
以典言其大常也治都鄙則使有所揆焉不特班
常而已故以則使有所揆焉者也治官府則悉矣故

以灋灋則事為之制曲為之防非特使有所揆而已
言治都鄙官府則先官府後都鄙者以大宰所治內
外之序為先後也言施典則灋及以待邦國都鄙官
府之治則先邦國次都鄙後官府以大宰所施所待
尊卑之序為先後也所治以內外之序為先後而先
言治邦國則六典以佐王治非與灋灋則序先後
而言故也治典曰以經邦國以紀萬民者有經則宜
有緯有紀則宜有綱經而紀之者典也綱而緯之則

存乎其人矣大宰帥其屬以佐王均邦國而治典以經邦國治職以平邦國者蓋治典之為書以經邦國而已治官之屬推而行之然後有以平邦國至於均邦國則王之事非治典之書所能及非治官之屬所能專所謂綱而緯之存乎其人者此也治典以紀萬民治職以均萬民則亦治典之為書以紀萬民而已治官之屬推而行之然後有以均萬民也大司徒率其屬以佐王安擾邦國而教典教職皆曰以安邦國

蓋教典之為書教官之為職止於以安邦國而已至
於擾邦國則王之事也雖然王之事於邦國亦有所
不獲擾焉故曰以安擾邦國也教典以擾萬民而教
職以寧萬民則亦教典之為書以擾萬民而已教官
之屬以其職推而行之然後有以寧萬民也大司馬
率其屬以佐王平邦國政典亦曰以平邦國而政職
以服邦國蓋政典之為書以平邦國而王之為政亦
以平邦國而已至於政職然後務以服之務以服之

則官人之事耳非所以為王也政典以均萬民而政
職以正萬民則亦政典之為書以均萬民而已政官
之屬以其職推而行之然後有以正萬民也禮典禮
職皆以和邦國以諧萬民蓋禮者體也體定矣則禮
典之為書與禮官之為職不能有加損也刑典刑職
皆以詰邦國以糾萬民其意亦猶是也蓋刑者形也
形成矣則刑典之為書刑官之為職亦不能有加損
也大宗伯帥其屬以佐王和邦國又曰佐王建保邦

國則王之事又能建保邦國非特以和而已大司寇
帥其屬以佐王刑邦國盖典與職能詰邦國而已能
刑則王之事也然而又曰刑邦國詰四方則雖王之
事於四方亦有所不獲刑焉盖或徒以威讓文詰加
之而已事典事職皆以富邦國盖事典之為書事官
之為職以富邦國而已事典則以生萬民事職皆以
養萬民盖事典之為書以生萬民而已事官之屬以
其職推而行之然後有以養萬民也於邦國曰經於

萬民曰紀於邦國曰安於萬民曰擾於邦國曰和於
萬民曰諧於邦國曰平於萬民曰均於邦國曰詰於
萬民曰糾於邦國曰富於萬民曰生萬民王所自治
也故其事致詳焉治典教典曰官府禮典政典刑典
事典曰百官者官府言其屬百官則言六官之屬天
地之官嫌於不分故言其屬而已四時之官嫌於不
通故言六官之屬也

以八瀟治官府一曰官屬以舉邦治二曰官職以辨邦

治三曰官聯以會官治四曰官常以聽官治五曰官成
以經邦治六曰官灋以正邦治七曰官刑以糾邦治八
曰官計以弊邦治

建官矣則設屬以佐之故一曰官屬以舉邦治設屬
矣則分職以治之故二曰官職以辨邦治分職矣事
非一職所能獨治則聯事以供之故三曰官聯以會
官治六官聯事則有故常違而辯焉則以故常聽之
而已故四曰官常以聽官治官常以聽百官府之治

而已若夫聽萬民之治則有八成焉故五曰官成以
經邦治以官常官成聽之矣然後以法正之故六曰
官灋以正邦治犯法矣然後以刑糾之故七曰官刑
以糾邦治自官屬至於官刑皆法而已徒法不能以
自行必得人焉為上行法然後治成聽官府之六計
則所以進羣吏使各致其行能為上行法也故八曰
官計以弊邦治官計者官府之治所成終始也八灋
或言邦治或言官治者官聯官常六官之通治雖六

官之通治而各致其一官之治故言官治與天地二
官嫌於不分故稱官府同意餘則各一官之治雖各
一官之治而六官相待而成治是乃所以為邦治也
故言邦治與四時之官嫌於不通故稱百官同意官
聯以會官治而小宰則以官府之六聯合邦治者大
司徒之職曰天地之所合也風雨之所會也蓋兩謂
之合衆謂之會以官府之六聯會官治則所會者衆
矣以官府之六聯合邦治則所合者官聯與邦治兩

而已

以八則治都鄙一曰祭祀以馭其神二曰灋則以馭其官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八曰田役以馭其衆

書曰建邦設都春秋曰齊人伐我西鄙都鄙者以其有邑都焉故謂之都以其在王國之鄙也故謂之鄙都鄙王子弟公卿大夫所食之采地也學以致其道

者士也在所崇養故以祿位馭之治以致其事者吏也在所察治故以廢置馭之言廢常先置者必有廢也然後有所置禮則上之所以制民也俗則上之所以因乎民也無所制乎民則政廢而家殊俗無所因乎民則民偷而禮不行故馭其民當以禮俗也刑所以為威而曰刑賞以馭其威者獨刑而無賞則有怨而已豈能使民聽服而畏哉田則上之所以簡衆也役則上之所以任衆也或曰馭其民或曰馭其衆者

言其會而為用則曰衆也凡造都鄙必先立宗廟社稷諸神之祀故一曰祭祀以馭其神宗廟社稷諸神之祀立矣然後立廟庭官府施灋則焉故二曰灋則以馭其官施灋則矣然後其違從廢舉可考而廢置也故三曰廢置以馭其吏廢置者所以治之祿位者所以待之治之者政也待之者禮也徒治之以政而不待之以禮則將免而無耻故四曰祿位以馭其士有吏士以行灋則然後政教立政立則所以富之富

之然後賦貢可足教立則所以穀之穀之然後禮俗
可成故五曰賦貢以馭其用六曰禮俗以馭其民政
教立然後繼之以刑賞刑賞則政教之末也故七曰
刑賞以馭其威威立矣然後衆為用故八曰田役以
馭其衆祭祀以馭其神者其神所享唯祭祀之從也
灋則以馭其官者其官所守唯灋則之從也廢置以馭
其吏者其吏所治唯廢置之從也祿位以馭其士者
其士所事唯祿位之從也賦貢以馭其用者其上所

用唯賦貢之從也禮俗以馭其民者其民所履唯禮俗之從也刑賞以馭其威者其民所畏唯刑賞之從也田役以馭其衆者其民所會唯田役之從也若夫典祀弗舉淫祠無禁巫祝費財殫昏傷民則非所以馭其神也上不知所制下不知所守私義害國私智非上則非所以馭其官也治不時考政不歲會勤不保置怠不患廢則非所以馭其吏也祿不論功位不議行貪汙取富誣僞取貴則非所以馭其士也征求

無藝費出無節奢或僭上儉或廢禮則非所以馭其
用也人自為禮莫能統壹家自為俗無所視效則非
所以馭其民也刑以幸免賞以苟得慢公死黨畏衆
侮上則非所以馭其威也富貲役貧豪傑兼衆使之
則怨作之則懼則非所以馭其衆也然則八則之於
都鄙曷可少哉治莫小於都鄙莫大於天下都鄙如
此則治天下可知矣

以八柄詔王馭羣臣一曰爵以馭其貴二曰祿以馭其

富三曰予以馭其幸四曰置以馭其行五曰生以馭其
福六曰奪以馭其貪七曰廢以馭其罪八曰誅以馭其
過

於六典曰佐王治邦國大治王與大宰共之也於八
濬八則直曰治官府都鄙小治大宰得專之也於八
柄八統曰詔王馭羣臣萬民則是獨王之事也大宰
以其義詔之而已予以馭其幸者其賢不足爵也其
庸不足祿也而以私恩施焉故謂之幸爵以馭其貴

則非王爵之無貴也祿以馭其富則非王祿之無富也予以馭其幸則非王子之無幸也生以馭其福則非王生之無福也奪以馭其貧則非王奪之無貧也置以馭其行則以置馭之使有行也廢以馭其罪誅以馭其過則以廢誅馭之使無罪過也蓋上失其柄則人以私義自高而爵不足以貴之以專利自厚而祿不足以富之取予自恣也則不待王幸之而後予生殺自恣也則不待王福之而後生有行或以違忤

貴勢而廢誅有罪有過或以朋比姦邪而見置則尚
何以馭其羣臣哉八柄與內史同而內史變誅為殺
蓋誅言其意殺言其事大宰大臣詔王馭羣臣者也
當以道揆故言其意內史有司詔王治當守法而已
故言其事誅又訓責而知大宰所謂誅為殺者以內
史見之也誅殺也而以馭其過者廢之則使被廢者
不至於得罪殺之則使衆知懼而莫敢為過失也大
宰八柄之序先慶賞而後刑威於慶賞則先重而後

輕於刑威則先輕而後重勸賞畏刑之意至於內史則慶賞刑威雜而莫知其孰先主於守法而不豫其以道揆之意故也

以八統詔王馭萬民一曰親親二曰敬故三曰進賢四曰使能五曰保庸六曰尊貴七曰達吏八曰禮賓

馭羣臣曰柄馭萬民曰統柄言操此而彼為用統言舉此而彼從焉親親孝也仁也敬故仁也義也是王之行也故一曰親親二曰敬故進賢使能保庸尊貴

達吏禮賓則有政存焉進賢使能然後有庸可保也
故三曰進賢四曰使能五曰保庸賢也能也庸也固
在所尚然爵亦天下達尊故六曰尊貴尊貴則抑賤
抑賤則吏之志能嫌不能達故七曰達吏自達吏以
上皆內治也禮賓則所以接外也故八曰禮賓馭以
親親而民莫遺其親馭以敬故則民莫慢其故馭以
進賢則民知德之不可不務馭以使能則民知能之
不可不勉馭以保庸則民知功實之不可害馭以尊

貴則民知爵命之不可陵馭以達吏則民知壅蔽不可為馭以禮賓則民知交際當以禮夫八統者各致其事不相奪也後世親親也因或進之敬故也因或使之保庸也因或尊之則失是矣

以九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂䟽材九曰閒民無常職轉移執事

山澤皆虞而曰虞衡作山澤之材者山虞掌山林之政令則其政令施於山林川衡掌巡川澤之禁令則其禁令施於澤矣虞衡山澤之官而作山澤之材者民職也則此所謂虞衡言其地之人而已嬪有夫者也婦有姑者也舅歿姑老則無職矣故所任者嬪婦而已九穀言生草木言毓鳥獸言養蕃者九穀不能自生待三農而後生草木能自生而不能相毓待園圃而後毓鳥獸能相毓不能自養蕃待藪牧而後養

蕃養蕃者養而後蕃之也飭化者飭而後化之也阜
通者阜而後通之也化治者化而後治之也聚斂者
聚而後斂之也九穀草木山澤之材人所食用鳥獸
則其肉以備人食其羽毛齒牙骨角筋草以備人用
故一曰三農生九穀二曰園圃毓草木三曰虞衡作
山澤之材四曰藪牧養蕃鳥獸百工因山澤之材鳥
獸之物以就民器者也故五曰百工飭化八材一人
之身而百工之所為備則宜有商賈以資之故六曰

商賈阜通貨賄任民以男事為主強力為先嬪婦女
弱也故七曰嬪婦化治絲枲臣妾則又賤者故八曰
臣妾聚斂䟽材閒民則八職所待以成事者也故九
曰閒民無常職轉移執事夫八職之民其事有時而
用衆則轉移執事曷可少哉蓋有常以為利無常以
為用者天之道也

以九賦斂財賄一曰邦中之賦二曰四郊之賦三曰邦
甸之賦四曰家削之賦五曰邦縣之賦六曰邦都之賦

七曰關市之賦八曰山澤之賦九曰幣餘之賦

下以職共謂之貢上以取政謂之賦以九賦斂財賄者才之以為利謂之財有之以為利謂之賄謂之財賄則與言貨賄異矣貨言化之以為利則商賈之事也邦中王之所邑其外百里謂之四郊與邑交故也又其外百里謂之邦甸甸法正在是故也又其外百里謂之家削家邑之地削小故也其外百里謂之邦縣小都之地取首在下取首在上取系在下故也又

其外百里謂之邦都大都之地所謂疆地也小都不
謂之都而謂之縣大都不謂之疆而謂之都相備也
蓋言郊甸削縣則都為疆地可知言都則郊甸削縣
為鄉遂公邑家邑小都亦可知也幣餘者職幣所謂
斂官府都鄙與凡用邦財者之幣振掌事者之餘財
是也餘財邦物而謂之賦者既以給之矣於是振之
以歸之邦故亦謂之賦也

以九式均節財用一曰祭祀之式二曰賓客之式三曰

喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好用之式

祭祀賓客喪荒人治之大者也祭祀在所尊賓客在所敬喪荒在所恤故一曰祭祀之式二曰賓客之式三曰喪荒之式人治之大廢而弗治則亡隨其後羞服用將誰使共之匪頒好用將以誰予然則羞服工事幣帛芻秣匪頒好用之式宜在祭祀賓客喪荒之後矣羞服之用急於工事工事所造急於幣帛幣

帛之用貴於芻秣匪頒好用則用財之餘事而好用
又不急於匪頒故四曰羞服之式五曰工事之式六
曰幣帛之式七曰芻秣之式八曰匪頒之式九曰好
用之式大宰以九式均節財用而小宰執九貢九賦
九式之貳以均財節邦用司會以九式之灋均節邦
之財用者邦國萬民有餘則多取而備禮焉不足則
少取而殺禮焉其用財也令邦國萬民以是為差此
所謂均財節用小宰則以貳大宰制財之多少與禮

之備殺為職令邦國萬民以是為差則弗豫焉此所謂均財節邦用司會則凡在邦國萬民者皆弗豫也以灋均節邦之財用而已

以九貢致邦國之用一曰祀貢二曰嬪貢三曰器貢四曰幣貢五曰材貢六曰貨貢七曰服貢八曰旂貢九曰物貢

祀貢凡可以共祭祀之物嬪貢凡可以共嬪婦之物器貢凡可以為器之物幣貢凡可以為幣之物材貢

凡可以為材之物貨貢凡可以為貨之物服貢凡可以為服之物旂貢凡可以共燕游之物物貢則凡祀嬪器幣材貨服旂之物皆是也大行人侯服貢祀物甸服貢嬪物男服貢器物采服貢服物衛服貢材物要服貢貨物而九貢一曰祀貢二曰嬪貢三曰器貢四曰幣貢五曰材貢六曰貨貢七曰服貢八曰旂貢九曰物貢者施政之序上先而下後內先而外後以詳責近以略責遠上以供祭祀之物使侯服貢之則

上先下後之意內以貢嬪婦之物使甸服貢之則內
先外後之意器服作治之功多使男服采服貢之則
以詳責近之意材貨作治之功少使衛服要服貢之
則以略責遠之意先器後服先材後貨則亦以遠近
為差九貢退服在材貨之後者材貨邦用所通服則
王身所獨大宰以道佐王者也於此又明王者養天
下以道其用材宜後其身之意幣旂物貢則六服所
通以幣繼嬪器之後以旂物繼貨物之後則亦各得

其所也九賦言斂九貢言致者邦國之財不可斂而取也致之使其自至而已九賦言財賄九貢言用者財賄以斂言也斂止於王畿則所斂狹矣用以散言也散及於邦國則所散廣矣大宰事王以道斂欲狹散欲廣王之道也至於司會以九賦之灋令田野之財用以九貢之灋致邦國之財用賦貢兼以斂散言則司會事王以灋主會其入出而已取欲狹施欲廣非其任矣

以九兩繫邦國之民一曰牧以地得民二曰長以貴得民三曰師以賢得民四曰儒以道得民五曰宗以族得民六曰主以利得民七曰吏以治得民八曰友以任得民九曰藪以富得民

牧九州之牧也連率卒正屬長國君皆以地得民而獨言牧者舉尊以見卑也于上舉尊以見卑則與舜典舉上帝以見日月星辰同意藪澤虞之藪也山澤之虞川林之衡皆以富得民而獨言藪則舉小以見

大也於下舉小以見大則與舜典言山川以見大示
同意長都鄙之長祿而不世不得有其地故曰以貴
得民而已師有德行以教人者也儒以道藝教人者
也宗繼祖者其族氏之所宗主有家者其臣隸之所
主主不得專地臣隸有治焉則吏聽之其貴又不足
道也則其得民以利而已吏則凡治民者皆是也友
則學校鄉田相與為友者也牧長皆君也師儒皆師
也自非君師則內莫尊於宗外莫貴於主吏則治之

而已友則任之而已數則民利其財而已自牧至數
皆有所兩則民有所繫屬而不散故多寡死生出入
往來皆可知也夫然後可得而治矣乃後世九兩廢
人得自恣莫相統壹而不知所以繫之故宣王料民
於大原而仲山甫非之也當是時上徒欲知民數而
不得尚安能得其情而制之乎民既散矣則放辟邪
侈無不為也故曾子謂陽膚曰上失其道民散久矣
如得其情則哀矜而勿喜

正月之吉始和布治于邦國都鄙乃縣治象之灋于象
魏使萬民觀治象挾日而斂之

正月之吉始和布治于邦國都鄙者歲終令百官府
各正其治受其會聽其政事于是調制所當改易故
正月之吉則始和矣乃布治于邦國都鄙也元者德
也正者政也德欲終始如一故即位之一年謂之元
年政欲每歲改易故改歲之一月謂之正月正月之
吉則朔月也朔月謂之吉則明生之幾故也三代各

有正月而周以建子之月為正夏以建寅之月為正
夏正據人所見故謂之人正授民事則宜據人所見
故周亦兼用夏時而以夏之正月為正歲始和布治
以周之正月而正歲又觀象灋則以兼用夏時故也
兼用夏時而以正月之吉使萬民觀治象則正歲先
王之正也正月之吉時王之正也萬民取正于時王
而已若夫百官則又當取正于先王也乃縣治象之
灋于象魏使萬民觀治象挾日而斂之者以其縣灋

示人如天垂象故謂之象治象之灋使民遍行之則
宜使民知故縣于象魏使民觀之挾日也正月之吉
言縣于象魏而不言狗于木鐸正歲言狗于木鐸而
不言縣于象魏相備也蓋觀象灋皆縣于象魏而狗
以木鐸或言狗以木鐸或言令以木鐸亦相備也蓋
皆行狗而言令之也或言象之灋或言灋之象者觀
則以象為主用則以灋為主以灋為主則曰灋象以
象為主則曰象灋或言灋象或言象灋則亦相備而

已相備而于大宰言萬民則灋以及萬民為大事故也

乃施典于邦國而建其牧立其監設其參傳其伍陳其殷置其輔乃施則于都鄙而建其長立其兩設其伍陳其殷置其輔乃施灋于官府而建其正立其貳設其攷陳其殷置其輔

乃施典于邦國乃施則于都鄙乃施灋于官府者既以治象示民於是乃以所建六典八則八灋施于邦

國都鄙官府也建六典八則八瀆舊矣于此言乃施則于是申之容有所改易故也盖大宰是自歲終詔王廢置至是既施典則瀆矣則王于邦國都鄙官府有廢置焉自牧長及正至于殷輔不在所廢則皆王所建立設傳陳置也苟錯諸地謂之置置之成列謂之陳使有所傳焉謂之傳設則設之而無所立也立則立之而無所建也建則作而立之也牧所謂以地得民者也監所謂三監也不言諸侯則上言牧下言

監包諸侯矣參三卿也伍五大夫也殷衆士也輔輔
治者也長所謂以貴得民者也兩兩也不謂之貳則
于其長有臣道與官屬異故也正官長也謂之正則
以其屬所取正故也貳則若小宰之于大宰是也攷
則攷殷輔之治者也

凡治以典待邦國之治以則待都鄙之治以灋待官府
之治以官成待萬民之治以禮待賓客之治

我之治彼也以此施焉故彼之治乎我也以此待之

祀五帝則掌百官之誓戒與其具脩前期十日帥執事而卜日遂戒及執事眡滌濯及納亨贊王牲事及祀之日贊玉幣爵之事祀大神示亦如之享先王亦如之贊玉几玉爵大朝覲會同贊玉幣玉獻玉几玉爵大喪贊贈玉舍玉

大神者昊天也夏曰昊天則帝與萬物相見之時故王所祀者昊天而已五帝則五精之君昊天之佐也凡在天者皆神也故昊天為大神凡在地者皆示也

故大地為大示神之字從示從申則以有所示無所
屈故也示之字從二從小則以有所示故也效瀆之
謂坤言有所示也有所示則二而小矣故天從一從
大示從二從小從二從小為示而從一從大不為神
者神無體也則不可以言大神無數也則不可言一
有所示則二而小而神亦從示者神妙萬物而為言
固為其能大能小不能有所示非所以為神惟其無
所屈是以異于是也大宗伯言祀大神享大鬼祭大

示而大宰言祀大神示享先王者大宗伯掌建天神人鬼地示之禮故各正其名序其位而言之大宰非禮官也則其佐王事神示祖考也以道事神示以道故大示不謂之祭事祖考以道故先王不謂之鬼謂之鬼則正名其為鬼而弗以神事之矣是禮而已非道也夫先王之王也有聖而不可知者及其死也亦如斯而已故詩曰三后在天王配于京然通于道乃知其為神制于禮則見其為鬼而已正言祀五帝而

以祀大神示享先王如之者其所佐則王其所職則
宰其為道也適足以紹上帝而已以祀大神示則為
不足以享先王則為有餘蓋能又王家則足以享先
王矣戒所謂散齋也禮記曰七日戒三日宿又曰散
齋七日以定之致齋三日以齊之齊之之謂齋定之
之謂戒大宰大宗伯同帥執事而卜日而大宰獨掌
誓者卜宜與衆占誓宜聽于一然戒之日又使大司
寇泣誓者犯誓則施刑故也大宗伯正掌建邦之天

神人鬼地示之禮故宿眊滌濯泣玉鬯省牲饗奉玉
盥大宰于六官特尊焉故及執事然後眊滌濯及納
亨然後贊王牲事及祀之日然後贊王幣爵之事六
官奉牲六官之人奉盥則牲事尊于盥天地不裸裸
以求神而已則幣爵之事尊于鬯大宰贊牲事而不
贊盥贊幣爵之事而不贊鬯則亦以特尊故也玉幣
玉獻玉几玉爵大朝覲會同之大禮贈玉舍玉大喪
之大事贈在含後而先言贈則贈事比含尤送終之

大者以其禮事之大故亦大宰贊之牲事言贊王其
下玉幣爵之事玉几玉幣玉獻言贊而不言王則蒙
上言王從可知也贊牲贊玉幣爵言事其下玉几玉
爵玉幣玉獻言贊而不言事則蒙上言事可知也大
宰言贊王玉幣爵之事而小宰言凡賓客贊裸凡受
爵之事凡受幣之事則大宰于幣爵之事無所不贊
而小宰所贊于其受之而已

作大事則戒于百官贊王命王眡治朝則贊聽治眡四

方之聽朝亦如之

所作謂之事所遭謂之故故有所因而使然者也
賦治朝言王而作大事不言王則作大事者大宰故也
蓋命者君所出而事之者臣所作故曰坐而論道謂
之三公作而行之謂之士大夫餘官言大事未有言
作者則大事獨大宰作之而已所謂治朝者聽治之
朝也巡狩四方則無治朝故曰聽朝而已

凡邦之小治則冢宰聽之待四方之賓客之小治

聽邦之小治稱冢宰則百官總焉故也既曰以禮待
賓客之治又曰待四方賓客之小治者賓客之治有
詔王者矣八統所謂禮賓是也若其小治則大宰專
之言四方則非特邦國而已賓客之小治非特邦國
則餘可知矣此亦于下舉小以見大也故曰冢宰統
百官均四海

歲終則令百官府各正其治受其會聽其致事而詔王
廢置三歲則大計羣吏之治而誅賞之

以八瀟治官府與施瀟于官府曰官府而已及歲終則曰令百官府各正其治受其會聽其致事者正其治受其會嫌特治官之屬故也正其治者為將受其會聽其致事以詔王廢置故各使之先自正其治也受其會者受其一歲功事財用之計聽其致事者聽其所致以告于上之事則其吏之行治可知矣于是乎詔王廢置然此非特為廢置也歲終平在朔易之時亦欲以知所當調制以待正月之吉布施之也誅

則非特廢之而已賞則非特置之而已三歲大計羣
吏之治而誅賞之不言詔王則歲終廢置尚以詔王
三歲誅賞可知矣大宰以六典佐王治邦國其職之
大者也以八灋治官府以八則治都鄙其職之小者
也先自治其職然後詔王以其職上則詔王以其職
下則任民以其職任民以其職然後民富民富然後
財賄可得而斂斂則得民財矣得而不能理則非所
以為均節財用則所以為義也治其國有義然後邦

國服而其財可致也能致邦國之財然後為王者之富富然後邦國之民可聚聚而無以繫之則散繫而無以治之則亂使萬民觀治冢宰施典施則施灋大祭祀大朝覲會同大喪大事至于待賓客之小治則皆其所以治也受其會聽其致事夫計羣吏之治而詔王廢置誅賞則其治之所成終始也

欽定四庫全書

周官新義卷二

宋 王安石 撰

天官二

小宰之職掌建邦之官刑以治王宮之政令凡宮之糾禁

小宰治王宮之政令而內宰治王內之政令王內后宮也內宰治后宮之政令故小宰獨治王宮之政令至于后宮之糾禁則小宰兼之故曰凡宮之糾禁也

掌邦之六典八灋八則之貳以逆邦國都鄙官府之治
執邦之九貢九賦九式之貳以均財節邦用

操縱之權上之所專故于六典八灋八則之貳則曰
掌出納之正下之所守故于九貢九賦九式之貳則
曰執執則固矣掌則掌之而已六典八灋八則之書
大宰與大史作而立之故大宰曰掌建邦之六典以
佐王治邦國以八法治官府以八則治都鄙大史亦
曰掌建邦之六典以逆邦國之治掌法以逆官府之

治掌則以逆都鄙之治夫皆作而立之也乃獨於六
典言建則舉大以知小故也司書則正掌其書者也
故司書曰掌邦之六典八法八則小宰司會則副掌
其書者也故小宰司會皆曰掌六典八法八則之貳
以逆邦國都鄙官府之治也逆者有所治正也有所
治正則逆之矣所治在大史則大史之所逆也所治在
司會則司會之所逆也所治在小宰則小宰之所逆
也非大史司會小宰所逆然後大宰以典法則待之

其言六典八法八則皆以六典為先八法次之八則為後者以應大宰所治之序也其言邦國都鄙官府則以邦國為先都鄙次之官府為後者以應大宰所待之序也至其言九貢九賦九式小宰司會所序先後皆與大宰不同則大宰以道佐王揆事使邦國服然後致其貢物故序九貢在九式之後小宰司會則以貢賦之法受其入以式法出之而已所以致其貢之序則非所豫也故以九貢為先九賦次之九式為

後

以官府之六敘正羣吏一曰以敘正其位二曰以敘進其治三曰以敘作其事四曰以敘制其食五曰以敘受其會六曰以敘聽其情

敘敘其倫之先後也以敘正其位者以其人之敘正之以敘進其治者以其位之敘進之謂治目有功進使治凡也以敘作其事者以其位治之敘作之以敘制其食者以其治事之敘制之以敘受其會者以其

治事與食之敘受之以敘聽其情者自會以上不得其情則皆有訟訟則各以其敘聽之

以官府之六屬舉邦治一曰天官其屬六十掌邦治大事則從其長小事則專達二曰地官其屬六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十

十掌邦事大事則從其長小事則專達

天地四時之官各以象類名之其義甚衆非言之所能盡觀乎天地四時則知名官之意矣蓋治所不能及然後教教所不能化然後禮禮所不能服然後政政所不能正然後刑刑所不能勝則有事焉刑之而能勝則無事矣事終則有始不可窮也故以邦事終焉

以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三

曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物所謂節財用者非特節邦之財用而已邦國不敢專利以過制萬民不敢擅財而自侈然後財用可節也故治職以平邦國以均萬民然後以節財用邦國不安萬民不寧雖其封域之內散蕩離析而不能守也又安能使賓客懷之故教職以安邦國以寧萬民然

後以懷賓客邦國不和則無與事其先王萬民不諧則無與致其禋祀故禮職以和邦國以諧萬民然後以事鬼神聚百物則將求之邦國萬民而已不能服之正之則其財豈肯供上之所求故政職以服邦國以正萬民然後以聚百物除盜賊則令糾守比追胥而已邦國不可詰則無以令糾守萬民不可糾則無以比追胥矣故刑職以詰邦國以糾萬民然後以除盜賊生百物則將任之邦國萬民而已不能富之養

之則其力豈能勝上之所任故事職以富邦國以養萬民然後以生百物六職終于以生百物則事者物之所成終始也

以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂施之聯事凡小事皆有聯

祭祀在所尊賓客在所敬喪荒在所恤三者人治之大也為人亂之也故有軍旅之事軍旅以用衆也田

則簡衆而已役則任衆而已歛施之事比田役為小
故一曰祭祀之聯事二曰賓客之聯事三曰喪荒之
聯事四曰軍旅之聯事五曰田役之聯事六曰歛施
之聯事

以官府之八成經邦治一曰聽政役以比居二曰聽師
田以簡稽三曰聽閭里以版圖四曰聽稱責以傅別五
曰聽祿位以禮命六曰聽取予以書契七曰聽賣買以
質劑八曰聽出入以要會

聽政役以比居者比謂國比居謂民居聽政役者欲知其可任與施舍而已故以國比正之以國比正之而不服則又以民居正之以國比正之則若後世以五等簿差役也以民居正之則若後世以簿差役不服則檢視屋產矣聽師田以簡稽者簡謂閱而選之稽謂考而計簡稽則皆有書焉聽師田者欲知其車徒之所任財器之所出而已故以簡稽聽之也聽閭里以版圖者版謂人民之版圖謂土地之圖閭則六

卿所謂五比為閭里則六遂所謂五鄰為里聽閭里者欲知其地域所守人民所屬而已故以版圖聽之也聽稱責以傳別者傳朝士所謂地傳也責傳其事者若今責契立保也別朝士所謂判書也判書稱責之要也別謂人執其一人執其一則書其所予之數使責者執之書其所償之數使稱者執之以其償責或不能一而足故也聽祿位以禮命者禮有數命有等祿位視此制之故也聽取予以書契者書簡牘而

已契則取予之要也契謂人執其一予者執左取者
執右合而驗之也別也契也皆要也稱責為之別則
其用以別為主取予謂之契則其用以合為主聽賣
買以質劑者質人大市則以質小市則以劑質則有
質其事者若人市契立見也劑則為要書而已聽出
入以要會者月計謂之要歲計謂之會八成所序先
後蓋或以事之大小或以治之多寡

以聽官府之六計弊羣吏之治一曰廉善二曰廉能三

曰廉敬四曰廉正五曰廉灋六曰廉辨

治汙謂之汙治荒謂之荒治亂謂之亂治擾謂之擾
則治弊謂之弊矣所謂弊羣吏之治者治弊之謂也
善其行謂之善善其事謂之能能直內謂之敬能正
直謂之正能守法謂之法能辨事謂之辨廉者察也
聽官府弊吏治察此而已欲善其事必先善其行善
行宜以德不宜以偽直內則所以為德也直而不正非
所以成德正然後能守法守法則將以行之行之則

宜辦事辦事則吏治所成終始也故一曰廉善二曰廉能三曰廉敬四曰廉正五曰廉法六曰廉辨此人之行能謂之六計者察其吏治而知其所以治者行能如此此聽官府弊吏治之數也故謂之六計焉

以灋掌祭祀朝覲會同賓客之戒具軍旅田役喪荒亦如之七事者令百官府共其財用治具施舍聽其治訟小宰掌戒而不掌誓掌具而不掌修蓋誓聽于一而修則有所加損戒與衆共而具則具之而已又言以法

則亦不豫道揆故也施惠焉謂之施舍政役焉謂之
舍理其事謂之治爭其事謂之訟財用出于官府施
舍加于人民治訟則或以財用之不共或以施舍之
不治故先言共其財用次言治其施舍後言聽其治
訟

凡祭祀贊玉幣爵之事裸將之事凡賓客贊裸凡受爵
之事凡受幣之事喪荒受其舍襚幣玉之事

宗廟之裸求神于陰賓客之裸則若今禮飲賓客祭

酒也裸將裸而將瓚也喪荒有幣玉則賻贈賙委之
物也

月終則以官府之叙受羣吏之要贊冢宰受歲會歲終
則令羣吏致事正歲帥治官之屬而觀治象之灋徇以
木鐸曰不用灋者國有常刑乃退以官刑憲禁于王宮
令于百官府曰各脩乃職攷乃灋待乃事以聽王命其
有不共則國有大刑

徇以木鐸文事故也文事奮木鐸尚仁故也武事奮

木鐸尚義故也有令焉必徇鐸奮之者蓋將以禁人
則宜使之皆知不使之不知也及犯令而刑之則是
罔人而已大司徒令于教官曰各共爾職脩乃事以
聽王命其有不正則國有常刑小宰令于百官府曰
各脩乃職攷乃灋待乃事以聽王命其有不共則國
有大刑者大司徒令于教官則所謂脩乃事者自其
教官之職事也小宰以宮刑憲禁令攷乃法則所以
避禁也令待乃事則其事有待乎王宮之政令焉故

也共所以事上正所以臨下在官則戒以不共在府則戒以不正亦各其所也為官刑而令獨曰國有大刑則以官刑宜嚴于官府今律宮殿中所坐比常法有加亦是意也小宰先正羣吏然後可以舉邦治其舉邦治也欲人分致其事故分職以辨之為其辨之有不能舉也故又聯事以合之有辨有合則官府之治無不舉矣於是聽萬民之治所謂羣吏之治者以聽萬民之治為主聽萬民之治矣于是弊羣吏之治

焉若夫以法掌戒具贊幣爵祿將舍祿弊玉之事則
皆其分職聯事所治也至于受羣吏之要贊冢宰受
歲會令羣吏致事則所治終焉觀治象以宮刑憲禁
則所謂終則有始也

宰夫之職掌治朝之灋以正王及三公六卿大夫羣吏
之位掌其禁令

治以致其事者吏也謂之三公六卿大夫羣吏之位
則比羣吏非大夫以上也小宰掌王宮之政令凡宮

之糾禁而宰夫掌治朝之法則所謂政也以正王及三公六卿大夫羣吏之位掌其禁令不言政及糾者正治朝之位則所謂政也以法正之則糾在其中矣叙羣吏之治以待賓客之令諸臣之復萬民之逆

下有事則治乎上上有事則令乎下大宰尊于賓客故大宰以禮待賓客之治賓客尊于羣吏故小宰叙羣吏之治以待賓客之令復有報乎上也逆有言乎上也上言而令之下聽而行之所謂順也下有言乎

上則逆矣

掌百官府之徵令辨其八職一曰正掌官灋以治要二
曰師掌官成以治凡三曰司掌官灋以治目四曰旅掌
官常以治數五曰府掌官契以治藏六曰史掌官書以
贊治七曰胥掌官叙以治叙八曰徒掌官令以徵令

掌官府之徵令辨其八職者有官府則有所徵令矣
有徵令則其所掌治不可以不辨也正其屬所取正
者也師則教其屬者也司則各自司其職事而已旅

則衆而有所從焉數一二三四是也合衆數而為目
合衆目而為凡合衆凡而為要要則月計凡則旬計
目則日計旬計則宰夫所謂旬終正日成是也一二
三四之數府史之所掌也而旅治之目則旅之所掌
也而司治之凡則司之所掌也而師治之要則師之
所掌也而正治之此官府之八職也故治至于要而
止若夫會則正之所掌也而王治之矣故大宰受百
官府之會而詔王廢置廢置在王則王治之矣王省

惟歲亦謂此也凡治官府以法為主成則以待萬民之治常則聽官治而已故正掌官法師掌官成旅掌官常司亦掌官法者正掌官法以正其屬司掌官法則貳焉而已

掌治灋以考百官府羣都縣鄙之治乘其財用之出入凡失財用物辟名者以官刑詔冢宰而誅之其足用長財善物者賞之

不言以法而言掌治法者宰夫所攷雖及百官府羣

都縣鄙之治然其事則治官之事其法則治官之法而已五官所掌攷則弗預也所謂縣者縣師所掌間田之縣也宰夫所攷及于百官府羣都縣鄙則大宰小宰所謂官府都鄙其為百官府羣都縣鄙可知矣不言會其財用而曰乘者以二三四乘之則謂之乘總會其數則謂之會欲知其總數則宜言會欲知其別數則宜言乘今此欲知其失財用物辟名足用長財故言乘其財用之出入也失其所藏之貨賄則謂之

失財非所用而用焉則謂之失用所失之物非貨賄也則謂之失物辟名則其出入名不正而已足用者用無不足而已長財則所藏又有餘焉善物則所作所受又無不善夫物有不可謂之財而財亦有物也言失財用物則失物非財以其既言失財故也言善物則財亦物也以其未嘗言善財故也所誅非特治官之屬也故曰以官刑詔冢宰而誅之誅以詔冢宰則賞可知矣

以式灋掌祭祀之戒具與其薦羞從太宰而眡滌濯具與薦羞則以式掌之戒與滌濯則以灋掌之

凡禮事贊小宰比官府之具

小宰以灋掌祭祀朝覲會同賓客之戒具軍旅田役喪荒亦如之七事者令百官府共其財用所謂官府之具者此也祭祀則吉禮之事也軍旅田役則軍禮之事也喪荒則凶禮之事也所謂凡禮事者此也

凡朝覲會同賓客以牢禮之灋掌其牢禮委積膳獻飲

食賓賜之殮牽與其陳數凡邦之弔事掌其戒令與其幣器財用凡所共者

牛羊豕謂之牢米禾薪芻謂之委積夕食謂之殮牢生可牽謂之牽牢禮則大行人掌客牢禮之等數是也牢禮之法則其掌之又有法焉委積則上公五積之屬是也膳則飲膳大牢之屬是也獻則上介有禽獸之屬是也飲則壺四十之屬是也食則食四十之屬是也殮則殮五牢之屬是也賓之殮牢則有司所

共賜之殯牽則王所好賜陳數則以爵等為之牢禮
之陳數是也

大喪小喪掌小官之戒令帥執事以治之三公六卿之
喪與職喪帥官有司而治之凡諸大夫之喪使其旅帥
有司而治之

與職喪帥官有司而治之則帥宰夫職喪之屬官與
其府史治之使其旅帥有司而治之則使宰旅帥其
府史治之

歲終則令羣吏正歲會月終則令正月要旬終則令正
日成而以攷其治治不以時舉者以告而誅之

告或以告于上或以告于下故不言所詔而曰以告
而誅之以告而誅之者不待三歲大計而誅之者也
正歲則以灋警戒羣吏令脩宮中之職事書其能者與
其良者而以告于上

宮正稽其功緒糾其德行歲終會其行然後宰夫得
以攷其會而正歲書其能者良者以告于上良者書

之賢可知矣